

人物以中和為仇其罪不除此六大罪天惡之不可除也吾將去有期戒六子一言大道乃洞無上無下無表無裏守其和氣名為臣子近求即大遠求即失故君王善為政者以腹中始起真能思道理自得矣近在習心散滿四海古者聖人名要道古者聖人之教帝王也深思遠慮閉其九戶休其四肢使其混沌比若環無端如胞中之子而無職事乃能得其理吾道悉以是為大要天寶其傳焉

○ 太平經鈔丁部卷之四

太平經鈔戊部卷之五

外五

以天讖文支干相配長安國家以理所問乃求索洞通天地之因讖文一言萬世不可易天君疾多災愁苦夫皇天以四時為肢地以五行為體肢主盛衰體主規矩部此九神同流天下上下洞極變化難觀為天下重寶為眾門戶自有固常不可妄化順之者長吉亂之者天地乖忤天常讖法以南方固為君也日在南方為君火在南方為君太陽在南方為君四時盛夏南方為君五祀電在南方為君五藏心在南方為君君者當衣赤服火之行也君有變怪常與陽相應非得與地相應也日者最明為眾光之長故天常以日占君德盛衰人君之法當求與仁者同家有心者為理共理者常當行道而好生故東方者好生南方者好養不仁不可共理不明不可為君長東方木仁南方火明東方主道南方主德道主生德主養東方為文龍見負之南方為章故正為文章也東方為少陽之始生也故出東方南方太陽君之盛德明照少陽君

之家木生火也少陰為臣以義屈伏於太陽故金隨火屈折可欲為臣者常以義屈佐君欲為也故少陰為臣太陰為民民流行不止故似水流行不息民者主當為國家主侯理生故水養木木者君之家也天之格讖少陽畏少陰故臣者反主錄國家主侯官屬也太陽畏太陰國有道德而君臣賢明則民從國無道德則民叛也是故理國之本民多為富民少為貧天格法分為六部東南上屬天萬物生皆上行蛟行人民皆出外屬天故天為之色外蒼象木內赤象火西北屬地萬物秋冬悉落下歸土人民蛟行至秋冬悉入穴而居故地之為色外黃白象土金內合水黑象北行也東方南方位尊上屬天主理為君長師父西北方屬地卑為臣為後宮為民者甲之後宮也甲天也王者之本位故為心星心星火也屬南方丙為火之長取其大明者也君之位也辛者丙之後宮甲者丙之父也故巳乃大皇后之宮也辛者配丙丙者甲之子故辛者小皇后之宮也丙者乃甲之適子

受受命之君也庚者屬乙是國家諸侯王之夫也壬者屬丁是帝王女弟之夫也癸者屬戊是國大皇后之婦家也十干各有所屬地主之十二支云何哉天之為法陰陽雖行相通者各自有家天之為法不同不舉家相隨而止爾甲者以寅為家乙者以卯為家丙者以午為家丁者以巳為家戊者以辰為家己者以未為家庚者以申為家辛者以酉為家壬者以子為家癸者以丑為家故天道反行理地道止也故有分土反無分民蓋有國故天地不移天反一日一夜周流一竟行之為常故十二支各有其處不隨干轉也酒者水之王水王當剋火火者君德也急斷酒以全火德吾之道法迺出以規陽入以規陰出以規行入以規神出以規衆書入以規衆圖出以消災入以正身出以規朝廷之學其內以規入室凡事皆使有限努力好學者各以其才能反失其常法外學遂入浮華不能自禁內學不應正路反入大邪諸學者迺有大病不能自知也其好外學才大過者多

入浮華今道大邪而無正文反名真道更以相欺殆也內學才太過者多入大邪中自得之也今古文衆多不可勝限凡學得其真事勿違其本也學於師口說者勿違其師之言是其大要夫學之大害合於外章句者日浮淺而致文而妄語也入內文合於圖識者實不能深得其結要意反誤言也凡事為天譚十十相應者是也十九相應者小邪也十八相應者小亂矣過此而下不可用也名亂天文陰陽不喜萬物戰鬪人民被大咎也養性法內見形容照然者是也外見萬物衆精者非也凡事常守本文而求衆賢說以安之者是也衆文章句而忘本事者非也天師為太平之氣出受道德以與上皇好有道之君乃下及愚小民其為恩乃潤於六合合於八極無不包裹道有九度分別一名為元氣無為二為凝靖虛無三為度數分別可見四為神遊去而還反五為大道神與四時五行相類六為刺喜七為社謀八為洋神九為家先一分為九九八十一道殊端異文密用之

則共為一大根以神為使人為門戶元氣無為者念身無一為也但思其身洞白若委氣而無形常以是為法二為虛無自然者守形洞虛自然無有奇也身中照白上下若王三為度數者積精選自視數頭髮下至足五指分別形容內外莫不畢數知其意常以是念不失銖分此為小度之術四為神遊出去者思念五臟之神晝出入見其行遊可以語言知其吉凶次度數也五為大道神者人神出乃與四時五行相類青赤黃黑俱同臟神出入五行神吏為人使可降諸邪也六為刺喜者以刺擊地願使人好巧不可常使七為社謀社謀者天地四時社稷山川祭祀之神不可妄為八為洋神者其神洋洋其道無可繫屬天下精氣下使人妄言半類真半類邪九為家先者純見鬼無有真道也天神自有神寶精光隨五行為色隨四時之氣為輿象為天地使人民萬物也天地之間陰陽之際莫不被德化而生焉守道德積善乃究洽天地鬼神精氣人民岐行萬物四時五行之

氣常與往來莫不知其善者矣

大慈孝順閭第一慈孝者思從內出思以藏發不學能得之自然之術行與天心同意與地合上有益帝王下為民間昌率能致和氣為人為先法其行如丹青故使第一明道德大柔間第二明經道德為百姓先學好道善聚德不致盜賊上有益帝王化之最真吉矣孝悌始學化善閭第三始學欲為善心中有庶幾去邪就正且成仁行未化也佃家子謹問第四佃家謹力子平旦日作日入而息不避勞苦日有積聚家中雍雍以養父母得土之利順天之道不敢為非有益縣官大不仁之子無義少年好兵聚姦閭第五無義之人不仁之子不用道理罵天擊地不養父母行必持兵恐畏鄉里輕薄年少無益天地之化反為大害并力計捕捐棄溝瀆不得藏埋不和家中欺老愛少共食異財閭第六家將必敗骨肉不和不能相教妄傳往來更相逃避背本向末其禍不救矣悔過棄兵閭第七生於窮里希有開觀不知善惡有過天下行不

合天賴有明君使我就善少不知學長乃悔之使善人賢士以五尺柱高卒有去閭學者當考問之一旦民皆為善矣悔過更合善閭第八室學不成禍亂悉生賴有明君知我情由令我悔過及致為人師矣大惡人邪貪敗化閭第九尸穢邪惡貪賊欺上害下大佞名為官賊似人之形貪獸之情無益天地陰陽災深當誅亡除過復正悔事閭第十悔過改行易心少無善情災害數生朝過暮改名為善人此十閭古賢聖人之法禁人為善使不相賊傷欲令各終天年運反其道防絕其本得觀太平之氣也神者皆以規正其根太相太相繫於帝王因以正天行之其次根繫於皇后因以順地理中根繫於東聖因以理陰陽細微小根繫於庶民因以理萬物大人為之得大中人為之得中小人為之得小皆可有正也帝王行道德興盛日大明少道德少明皇后行道德月大光明少道德少光明眾賢行道德星曆大耀少道德少耀四根俱行道德天下安寧瑞應出大光遠遠觀天象風

兩時善夷狄歸心災害自消令得天師書道德以往付謹民使謹民使歸上有大仁道德之君可以平天下之理而長安身帝王尸上皇天之第一貴子也皇后乃地之第一貴女也夫至神聖貴人職當居百重之內而反憂天下萬里之外受天業為陰陽六合八方持統首天地之尊位為神靈所因任上下洞極萬物蛟行之屬莫不歸心於是作無上靈寶謁能知天意明於星曆之吏名為太史直事不得適日與夜送上觀候天氣感哀三光之得失樂得天勅戒以自安也十一月則修黃鐘導地下之氣使上通樂得后土意以自安矣作明堂於太陽丙午之地為其闢八窻四達樂通八方四時之氣欲與八風四時之氣合其吉以自安也明闢四門樂得天下奇文殊策希見之物賢明異術可以長安天下而消災異古者聖人在位常力求隱士賢柔可以共理願聞四時為尊貴然王氣乃為無氣之長也眾氣所繫屬諸尊貴之君也王氣乃為天為皇為帝為王為太歲為月建為年岡

為青龍為大德為盛興為帝王為無上王為生成主是故王氣所處萬物莫不歸王之王氣所居皆王而生所背去悉死由元氣也故王氣處陽則陽王居陰則陰王居天則天王居地則地王所處者皆王受命主理是古者聖人王者春東夏南秋西冬北六月中央而氣則謁見天王氣乃尊於天當月建名為破大耗當帝王氣衝為名死滅亡元氣建位帝王氣為第一氣尊嚴不可妄當也月建後一為閉閉者乃天主閉塞其後陰休氣恐來前為姦穢于帝王建氣也故閉其後也開者天之法不樂害傷也故開其後者示教休氣為其有為姦者樂開使退去也不去當見收收則考問之則成罪罪則不可除令死危故後五為危危則近死矣故後六為破天斗所破乃死故魁主死亡乃至危也故帝王氣起少陽太陽常守斗建死亡氣乃起於少陰太陽常守斗魁是故後六將天常休之空之與地同氣主閉藏匿奸究與邪鬼物同處不可妄開發古者賢人好生也悉氣屬斗前與天行

并故曰吉能有氣也諸為奸猾陰賊惡邪志象陰氣屬斗後故日衰所為者凶元氣恍惚自然共凝成一名為天也分而生陰而成地名為二也因為上天下地陰陽相合施生人名為三也三統共生長養凡物名為財財共生欲欲共生邪邪共生奸奸共生猾猾共生害而不止則亂敗敗而不止不可復理因窮還反其本故名為承負夫天道無心遺不肖則亂得賢明則理古者帝王得賢明乃道興不敢以下愚不肖為近輔速以吾此文付上德之君行之洞明者光以三氣相見問之占十中十所理悉理此第一善明可以為帝王使占十中九一氣亂不理可為諸侯使占十中八二氣亂不理可為凡人使過此已下名亂天正道必有冤結鬼神精伏逃不見不可理不能調和太平之氣子欲得道思書天求道之法靜為根為根精精不止神之門五德和合見魂魄心神已明大道陳先知安危察四隣群神大來集若雲若是不息長壽若我大道不用勤形若死灰守魂神魂神不去乃

長存周者及始環無端去本末求道有患眾民夫之不得完思其意無失真言清靜為本非用錢可不重愛明師言順受師語不死焉愚者逆師與鬼隣不得正道入山門遂不復還去神骨肉腐塗稱祖先命已滅亡大窮焉凡愚之術皆從內出自有法律厚為本根見神而活亦無苦愁神惡勞烈安心定意慎無暴卒久久自靜萬道俱出長存不死與天相畢為之必和與道為一賢持無置凡事已畢俗念除去與神交結乘雲駕龍雷公同室軀化而為神狀若太一詳思書言慎無失節凡精思之道成於幽室不求榮位志日調露開蒙洞白類似晝日不學之時若夜視漆東西南北迷於其室今賢聖惶懷心獨戰慄五守已強不死亡安貧樂賤可久長職反求貴道相妨尊官重祿慎無望強求官位道即亡不若除臥久安林不食而自明百邪皆去遠禍殃守靜不止不喪幸可長命而久行無敢恣意失常求之不止為道王治活之術各異方與民殊事不相妨上之好生民命久長俗教

道上有仁王聖主思道化下流行令民清康永無禍殃民之不死上之明也上無明君教不行不肯爲道反好兵戶有惡子家喪亡持兵要人居路傍伺人空閑奪其裝縣官不安盜賊行觀民可爲上可明人君好仁下來長生上之不仁下多邪傾皆令夫死不知樂生下惡好德上教令也民之好道者其王明也盡欲長生速禍殃也不食廉潔去諸兵也毒扶無爲棄不祥也聖主大興其民相親也恩及下愚是其王也天道好生以安上也下愚不爭上之慶天下幸甚莫不歸王也民不好道者上之不明也內懷姦心明行也不好爲德反好兵也父子分離居道傍也不得長生積死喪也家有貧子若虎狼也上之無德兵禍殃也下愚爲君化不行也民多好仙帝王明也天見其治恩下行也蚊行喘息皆被光也

經也古者將學問者皆正其本此若種木也本索善種置善地其生也本末枝葉悉善本者是其本師枝實者是弟子是故古之學志先念思本乃學其道也故可爲者得與天心合故吉也夫種木不擇得善木又植惡地枝葉華實安得美哉此者始以端身正性道意止歸之元氣還以安身念古法先師所職行何以能自治計定意極且自得之先以安形始爲之如嬰兒之遊不用筋力但用善意詳念先人獨壽其治獨意以何得之但以至道繩邪去姦比若神矣無有奇怪本正以是爲之故得天心不負地意四時周五行安子孫不相承負各懷至德不復知爲邪惡也入室獨居思經道之本所須出入賢者先得其意其次隨之遂俱入道與邪相去矣

者爲賤生者爲貴子守道可長久隨氣而化天爲常無急名利道自行天道常生無有喪地道持兩主死亡夫上古聖賢者於官中士度於山下士蟲死居民間賢者見書深思此言先難後易身亦無患而守德成大道身學已更入室成神人其念常與凡人殊絕異朝夕未常念地上欲聞天事也意乃念天上職事乃後可下入室精精篤竭自化易其形容即是上天聖人也不得復理民間時事明矣吾之書乃使高士遂生而不見下士不敢妄爲妄言也吾書爲道所能窮竟人志使人賢不肖各盡其才至死無可復悔者乃各盡其天命也欲壽樂久存者思正道意可往矣不樂久存者宜就俗事但樂止其身而已驗行鏡其身自知可爲得失法賢明智過包覆天地積書無極而不能自壽益命此名空虛無實道也術士之師也久久還自窮之學能遍授天文地理悉解萬物之情衆書並合備具而不能事親尊君此知無益也詳思此言吉凶可知矣此以簡行即令人自知得失學問

何者為急故陳列二事分明士意失得之象自開闢已來行有二急其餘欲知之亦不可知之亦可天地與聖明所務當推行而大得者壽孝為急壽者乃與天地同優也孝者與天地同力也故壽者長生與天同精孝者下承順其上與地同聲此二事者得天地之意凶害自去深思此意太平之理也長壽之要也諸欲為善求活者少故父母者生之根也君者授榮尊之門也師者智之所出不窮之業也此三者道德之門戶也父母傳天地陰陽祖統也師者傳既知天地之意解凡事之結君者當承天地順陰陽當務得其意以理道為事故此三者性命之門戶也深思此言萬害除矣壽孝者神靈所愛好也不壽孝者百禍所趨也此道自然不用力欲知其効常隨人意善惡所致心意謀事於內響應於外欲知其道正影響之應也心以意吉凶之門戶古者太平之君其理要但用心意善即臣善用意誤得臣亦誤心意天地樞機也不可妄動也使和氣錯亂災害日生矣

太平經鈔戊部卷之五

正一天師清微弟子 洪百堅 製作



道教學術資訊網站



太平經鈔己部卷之六 外六  
 今天下所畏口閉為不敢妄譚今日月星曆親天之列宿神也尚相畏是故日出星輒逃匿不敢見畏其威也夫四境之內有嚴帝王天驚核雖京師大遠畏詔書不敢語也一州界有強長吏一州不敢語也一郡有強長吏一郡不敢語一縣有剛強長吏一縣不敢語一閭亭有亭長剛強乃一亭部為不敢語此亭長吏之小者況其大者乎皆恐見害各取解免而已雖有善心意不敢自達於上使道斷絕一家尚親自共血脉同種類而生乃相畏如此況異世乎自中古以來失道德反多以威武相治威相迫脅有不聽者後會大得其害傷深流子孫下古尤甚小有欲上書言事自達帝王比近探其命者輒殺之不即時害傷更相囑託而傷害之故臣民悉結舌杜口為暗雖見愁寃不得上達故今帝王聰明絕也天變日多是明證効也今民親得生於父母受命於天地以天地為父母見災變善惡是天地之譚語欲有所言也且尚皆畏見